



南滁會景編卷第四

詩集

豐樂亭

豐樂亭小飲

歐陽脩

造化無情不擇物
春色一到深山中
山桃溪杏少意
思自趣時節
開春風看花遊
女不知醜古粧
野態爭花紅
人生行樂在
勉強有酒莫負
琉璃鍾
主人勿嘯
花與女嗟爾
自是花前翁

綠樹交加山鳥啼
晴風蕩漾落花飛
鳥歌花舞太守
醉明日酒醒
春色歸

春風淡淡日輝輝
草惹行襟絮拂衣
行到亭西逢太
守
藍輿酪酏插花歸

紅樹春山日欲斜長郊草色綠無涯遊人不管春將
老來往庭前踏落花

次韻

陳則清

五馬行春布穀啼輕羅偏趁暖風飛丁寧父老須勤
作看取西疇滿穫歸

幽谷還憑遺墨輝登臨湯爾試春衣悠然若得當年
趣緩步毋訪載咏歸

亭外逶迤山路斜亭前勝槩自無涯從今豐樂非陳
迹還擬當年盡種花

郭維藩

往來二十載茲亭始一登舊構逢初煥名遊喜得朋

溪流常宛轉山勢互憑陵塵鞅明朝發重過恐未能
我到尚初夏斯亭恰及成林泉還勝迹豐樂舊知名
無復人呼應猶餘鳥弄聲悲歡空嘆感因見古人情

次韻

楊果

危亭還舊觀散屐得斯登石隙刊名字山靈內友朋
林花紅點綴徑草碧侵陵欲挽高僧住何人是惠能
遺構何年廢新亭不日成山川回嘉色巖洞扁初名
杖屨人扶醉絃歌鳥和聲九原如可起歐老詎忘情

次韻

陳達

亭去民多疚于今歲甫登乘時開勝境掃榻待良朋
遠嶼煙光杳長空浩氣凌追遊應有記薄劣愧無能

五百年燕廢不崇朝落成種松人假蔭磨石客題名
豈是留連地猶宜絃誦聲醒心澄坐久因識醉翁情
滁陽山勝數瑯琊石逕縈迂眼界遮爭似此亭俯城
郭儘教四野獻桑麻古今與廢時非偶六一風流跡
未賒更愛清泉莫虛負遠欄還種紫薇花

張濂

山亭遊賞共高朋石路峯雲轉百層江上雄圖滁古
跡歐公文藻至今稱蒼茫此地還如昔豐樂斯民却
未能把酒賦詩增感慨百年安得歲時登

夏尚朴

山水此云最真宜着此翁飲泉知地勝樂酒爲年豐

遺愛今猶在高文古亦崇飛蝗方作孽忍對菊花叢

元夜邀太僕諸公飲豐樂亭 馬敷

一尊開勝地候吏報賓來旌旆連雲霧光輝動草萊
論文春夜靜對酒晚風催幸此同幽賞高軒未擬回
嘉客鸞鷟拂紫煙主人載酒豐山前月明幽鳥低鳴
樹雲覆孤亭斜抱川元夕此成冠冕會東風重上紫
薇泉浮生相會又相別爲報開懷莫黯然

次韻

王崇獻

擬赴春山約遙瞻使節來風雲開澗壑車馬散蒿萊
暫罷金吾禁何愁玉漏催夜深靈樂動疑是紫雲回
孤亭深處翠浮煙折簡相邀午漏前四座衣冠同泛

槩萬家燈火映長川客懷繾綣爲東道酒爲馨香出
釀泉却笑牛山無好况沾衣空使淚潸然

次韻

石祿

亭外群峯歛翠煙燈光星彩燦筵前狂歌只欲侵層
漢縱飲渾如吸百川此夕春風陪杖屨暮年佳興愧
林泉登臨且勝今宵月一別青山一惘然

次韻

周冕

日晴林壑散朝煙疊嶂呈青綺席前幽谷名花堪奪
錦紫薇靈派欲成川物情偏爽三春候飲興還追六
一泉賓主相忘今日樂夕陽歸騎思悠然

奉約王太卿登豐樂亭阻雨不果移就驛舍水

閣

李松

豐樂成虛約天光未放晴亂雲低古樹急雨暗層城
驛舍觀山迥溪亭酌水清晚來秋興發別後不勝情
攬轡經滁地觀風復此亭秋深修竹勁雨過遠山青
未許翁先醉誰云我獨醒公餘聊短述蛩韻不堪聽

次韻

王崇獻

我愛豐山雨何須爲乞晴綺筵開栢府新釀泛蒲城
玉漏催更早金風入座清殷勤留客住總是故人情
移席倚山館開尊近水亭坐中頻眺望簾外總丹青
別久都成夢情深愧半醒倚欄歌一闋灑泣爲君聽
諸公邀飲豐樂亭

張寅

春到滁陽暮人從豐樂遊煙霞如有約冠蓋許通幽
僻地看司馭高情擬醉歐山川同一嘆今古此生浮
長驅陟危岫極目俯荒堦雨霽遠山碧歲時幽草青
奉車新卜地太守舊名亭泉石迷歸路寒絃夜可聽

春日遊豐樂亭

裴騫

亭結層峯岫山通曲逕微雲鈴孤塔遠霧堞錦禽飛
夜藥燒丹竈春泉釀紫薇陰崖石髓冷陽坂蕨芽肥
海鶴巢松頂沙鷗立釣磯採花行打獵賭奕坐攻圍
惟木撐猿背修篁作鳳威駮龍同羽客斑鷺罷朝機
玉府清虛殿閒門水月扉梅花方的的楊柳正依依
事業明時誤林臯素興違官評何處是華歲已知非

掃市看人度柳籬亂艇維願借同冠賞燈火醉言歸

次兩洲公韻

王邦瑞

幽谷高亭結凍雲夜遊雪色皎星文山川不負籃輿
興六一猶傳勝槩存石磴餘寒歷峻絕松濤遙落自
清芬十年門下慚桃李更喜他鄉共客樽

首夏豐樂亭飲

戚南山諫議值雨用裴子孝

韻

高澄

曙色籠雲淡鳩聲促雨微遊絲沾濕墮饑鳥傍溪飛
衲子停樵採山厨具蕨薇酒芬春味列膾細暮魚肥
禪語喧僧室漁歌起釣磯巖花紅紫落山色翠蒼圍
廬草驚龍卧崗桐憚鳳威楓宸容析檻鷗鳥信忘

機爭訪黃門客相過白石扉殘英流水見病鶴古松
依二美東南盡孤標上下違占君家食吉愧我宦遊
非逝水雖難返橫舟尚可維雨中兼客邸爛醉始言
歸

冬至過滁石淵泉北邀飲豐樂亭詩以道謝

戴金

四牡長驅覲 帝堦停驂豈復故遲遲蘭臺舊雅平
生約豐樂新尊此會期勝景不渝霜落後寒芳猶待
客來時夜深秉燭論心處漫笑麤豪爲酒移

次韻

傅炯

萬里行旄覲 鳳墀臨滁莫訝暫稽遲澄清臺上君

先進淵塞官聯我後期壯 國江山千古勝洗天風
雨一陽時豐亭杯酒論心曲舊約應和永不移
幾年簪笏聚 彤墀聞說豐亭到恨遲草樹餘香因
雨噴江天一色與晴期相逢滁地登臨客共憶歐公
醉樂時石刻空留千載墨民風今日賴誰移

劉存德

豐樂亭開刺史碑干戈猶記晉陽時百年興廢今還
昔此日登臨歌更悲幸有衣冠逢世盛敢同草木敖
皇熙東臯雨後眠黃犢一曲薰風酒滿卮

次韻

孫存

藝祖深宮秘誓碑英孫初御啓帷時愛賢微意亮天

覆懸闕孤忠宋玉悲亭谷一朝隨化改鶯花千載共
春熙誰將此意陳宣室也得斯亭酒一卮

陳大壯

使華晴轉白雲岑玩世亭開紫邏深釋褐故人勞繼
纒賜環遷客慰登臨江空望眼秋能闊歲晚離懷酒
易斟潦倒風前忘底事百年始識醉翁心

徐九臯

勝景開滁甸名亭麗紫霞崇岡圍列嶂傑構俯千家
泉吐靈湫液碑存太守施圖書今一統豐樂共諸華

戴金

雲亭風致擬僊樓興協僚朋爲我携春去已多花見

少山無遠近綠苔齊蘭臯繡谷便平流賞牧唱樵歌
入品題擅望不輸豐樂意聯雲菜麥正成畦

次韻

屠楷

亭臨山水得幽棲公暇芳樽共此携遠檻巖花紅半
吐傍溪隴麥綠初齊雲開環岫來新眺蘇拂豐碑見
舊題向晚更憐西澗雨春流隨意滿前畦

次韻

田濡

不到山亭雲欲棲曉隨仙屐渡芳谿徑通幽谷綠花
細門倚晴巒列障齊共仰前賢披舊跡閒從野老問
春墾名存豐樂誇今日試看臨流亂綠畦

張忠

豐樂亭壯麗賦客喜談詩春耀桃花藥煙籠松樹枝
浮鷗翻白浪落燕點青漪信是滁陽景風光正可期

屠楷

豐亭春日獨相求聞說當年太守遊物阜歲登民自
樂鳥啼花發谷真幽千年翰墨今猶見絕代風流若
與倚從此滁陽名勝地至今西澗可橫舟

春日飲豐樂亭晚過觀泉

山亭月上烟清輝步影尋源歷紫微到面雨聲喧澗
壑隔林雲氣護岫扉旋分雪乳供茶鼎故濯塵纓坐
石磯最是暮春天氣好不妨游衍澹忘歸

扈永通

俯滁卽豐樂三兩嵌山亭樓觀開晴霽風雲起晦暝
谷虛空積穢溪澈見衰形門對城隅塔煙嵐出翠屏

嚴時泰

豐樂亭從何處求野橋西澗轉林丘豐山更值豐年
好獨樂何如衆樂優自立穹碑畱刻在人歌遺澤幾
時休論翁聲績還宏遠莫只稱翁刺此州

次韻

高澄

彼美人兮不可求遺踪猶見在山丘一亭有義名豐
樂千載無人較劣優恩及滁人原皞皞量恢相度自
休休鼎彝竹帛垂今古不獨芳名著此州

潘恩

昔賢開此山亭勝我輩嘉辰試一臨眺覽頓忘蒼翠
合躋攀不覺薜蘿深桑麻未黍豐年慶水石雲霞後
樂心盡日夷猶情不極歸乘月度最高岑

余胤緒

縱步豐樂亭谿山更清絕敬挹醒心盟細玩保豐說
憂樂本相乘政學原一轍驩虞落偏霸況不恤民血
堪嗟口耳談易墮機械訣賴有陽明靈佑我持晚節

太僕諸公邀遊豐樂亭望瑯琊山寺簡謝二首

龔秉德

逕轉石巖深復深鶯花相伴此招尋群公夙抱煙霞
想孤客兼多雲水心森森流泉歸別澗冥冥飛鳥下

遙岑眉山古調廬陵記讀罷能無三嘆吟

瑯琊寺迥煙雲橫豐樂亭幽芳草生遠峯近峯銜
霧千樹萬樹皆春聲蘇公筆落幾年蹟歐老文收百
代名更欲探奇行且罷亂山深處聞猿鳴

和韻

趙汝濂

豐樂山亭紫翠深謾勞賓從此幽尋昔人已去餘陳
迹今日重遊同賞心蘿薜暫淹驄馬使煙霞更見白
雲岑塵驅未許酬真息悵望真真猿鶴吟

山峯疊疊曉煙橫况是春妍青草生洞壑幽閒連野
色松蘿盤蔭迤泉聲遊歡未盡剡溪興登賦應需謝
客名禽鳥亦知人意好夕陽深樹散喧鳴

和韻

卷八通

雲霧蒼茫石磴深青郊幽况也相尋乾坤亭館前賢
地關塞星河萬里心衰病旅懷耽用綺明時篇什重
高岑啜芳徒倚春山下梁甫聊爲次第吟
望望南滁山岡橫山岡迴合煙雲生感慨高人遺勝
跡追遊薄海流芳聲小酌野亭萍會洽觀風繡斧臺
端名眼前靈貺都收盡猶愛啼春幽鳥鳴

和韻

胡賓

名賢亭館碧山深山畔長松餘百尋古逕桃花依日
角春泉蘿影陰潭心緣巖擬瞰虬龍窟轉壑如凌威
鳳岑好是南臺風雅客獨揮清藻發高吟

野寺風煙帶郭橫幽林迴眺暮光生閒雲半擁遙峯
色霽雨新添小澗聲共卽琴尊陪勝侶却疑纓冕繫
浮名平蕪歸騎昏鐘外猶自黃鸝深樹鳴

豐樂亭成井居侍御燕集

張舜臣

柱史招携六一亭尋幽訪勝出郊坰平沙萬木連江
闊仄徑千峯接漢青取醉不妨臨惟石凭高偏欲睇
滄溟西山祠屋看隣近翠壁松濤盡日聽

次韻

章煥

西臺使節駐山亭問俗觀風過遠坰共倚琅玕開夏
簾相看石壁映高青迴眸玉立空千里縱翼雲垂覆
八溟坐假霜威消暑暘四筵霏屑更堪聽

次韻

成子學

天飈舞袖拂山亭入望煙雲鎖碧堦斷碣含苔還上
綠踈林返照欲迴青千年丹竈降龍虎一脉甘泉會
渤溟空谷清風如有待無聲律呂更須聽

章煥

一上豐山豐樂亭每從遺構表遺靈亭中好事今能
否亭外群峯只自青幾派飛泉當樹杪數家煙火起
寒汀何時重覩豐平樂再續歐公石上銘

辛亥春予奉

冊使楚藩道滁陽同卿雷古和招遊豐樂醒心亭
眊紫薇泉屬以行迫醉翁瑯琊之勝不及遍訪

悵然有懷漫紀二律

胡杰

太守何年逝風流尚此亭乾坤遺勝槩草木有餘馨
曲徑緣幽嶼飛花襲短屏誰能戀茲賞將役不遑寧

其二

山水緣人勝招携荷主賢芳亭一以眊泉谷自依然
未盡探竒興徒為別思牽征途日紛鞅重入是何年
滁守同年熊憲韓燕豐樂亭賦贈

雨霽登山足勝遊高亭清景豁吟眸隔簷鳥語歌聲

沸入座花香酒氣浮三載已聞嬉樂歲熊守滁三歲
但登

百年端擬見前修驅馳愧予萍蓬跡勲業期君汗竹

留

同卿雷古和謙別環山樓

傑構中天起芳筵選日開興豪忘主客地勝有樓臺
去路愁攀柳離歌怨落梅相逢即相別把劍思悠哉
太僕陽華巾石濱陽三丈招飲豐樂亭二首

游居敬

出郭登山歷翠微山腰遙見一亭依雲開翠栢臨潭
黑雪積朱甍向日輝勝跡喜逢賢地主張筵何啻誦
緇衣酒餘更憶興

王處

龍起當年四海歸

夢想多年到此亭得因此

覲見山青峰巒拂漢堆瑤玉河水通泉耀并星碑碣
昔賢留翰墨忠良

昭代作儀刑登臨無限瞻依思半日停車酒未醒

次韻

章煥

六一亭高倚翠微沙頭雲樹遠依依遙看霽雪生寒
彩共指清光比德輝弭蓋暫倍福下酌含香猶識殿
中衣蘭臺謦讀囊封草薇省今從天上歸

浩蕩春風到草亭望中梅柳已含青山河表裡開雄
覽雲霧江天辨法星落日荒祠增感慨空帷遺像凜

儀刑懸知此會關憂樂不向尊前問醉醒
四海冠裳共一亭百年相對眼終青諸侯暫露行春
冕太史應占聚德星暇日登高能作賦風塵獨立表
儀刑傳盃無限壽躋意每到盃來酒更醒

過滁于野年兄招飲豐樂亭寄謝 孫應奎

西向滁陽逢故人燈前憶別恨重新且憐物色今來
變更覺交情老去真綠樹林泉携選勝白雲亭館坐
移辰滿山飛雨如迎客瀟灑隨風清路塵

次韻

鄭大同

廿年龍虎榜中人忽漫相逢情更新幾爲暮雲牽客
夢都於尊酒見天真故山回首俱南國晴日登高望

北辰共醉歐亭聽黃鳥不應岐路起風塵

太僕諸公邀登豐山絕頂漫興一首

胡松

至後晴暄興不孤上卿邀客載行厨江淮兩戒開形
勝吳楚橫分出畫圖細指山川論氣槩平看星斗接
虛無憑高忽動凌霄思黃鶴東來岸幘呼

次韻

鄭大同

崔嵬萬丈倚雲孤步到山頭巳午厨歲晏和風能有
幾眼前真景不須圖興逢志合千盃劇心與天遊一
礙無飛鳥似知吟欲就隔溪故故向人呼

次韻

呂懷

萬仞岡頭石室孤藥爐丹鼎煖仙厨雲分鳥道迎台
仗日麗龍泉吐帝圖心曠俯觀群動息眼空轉覺
一塵無幽歌只與山禽共林外數聲相對呼

登豐樂亭用韻

高燿

滁陽停蓋久亭館此初登勝跡借心目良遊得友朋
煙光浮岫杳爽氣入秋凌欲共居人樂憂時詎可能
愛此孤亭邃岩巖接漢成前賢畱勝槩我輩仰芳名
村斷桑麻影巖藏泉溜聲古今登覽地憂樂不同情

豐樂行

鄭用賓

山亭翠壁孤雲幽柳塘花塢成丹丘出谷正憐白日
暮逢人惟說舊時遊舊時太守神仙客行春五馬城

南陌露泫棠陰笑口開酒薰花氣忘頭白一醉百醉
輕黃金玉賓傾倒稱同心裊裊遊絲爭繞樹嚶嚶嬌
鳥共啼林青袍白馬誰家子銀鞍玉勒隨穠李流水
堦前拂素琴碧桃洞口浮香蟻醉後狂歌不可聞直
上青天過彩雲落日煙花仙妓合春風絃管采鸞分
滁人不是蕩家者風流太守豈盃犖卜夜藏鈎絳臘
前傳詩展席蒼松下我聞太守才且賢郡中無事高
枕眠清興入山攀桂苑丹心零雨稅桑田千家萬家
村釀熟隔溪吹笛騎黃犢樵徑誰知漢姓名桃源仍
是秦衣服十風五雨歌帝仁野多高廩不愁貧獻韭
時過豐樂地暴暄應作太平人世事榮衰堪太息山

川滿日轉沾臆昔年瓊館對煙霞今日黃埃閉荆棘
遊豐樂亭有感

山城春盡落花幽載酒重過太守遊芳草路深明月
冷紫微亭俯碧雲流杜陵憂國頻看劍王粲思家獨
倚樓懷古長歌還佇立風光曾似昔年不

春日偕周荆山秋卿登豐樂亭昏黑乃歸有賦
包大魁

乘輿看山不厭忙巾鞋長日縱清狂寒泉古石虛堂
靜細草新蒲滿路芳無數觥籌交錯落一鈎林月映
空蒼天涯肯負青春色况喜親朋會別鄉

秋日陪侍御張龍坪公
游豐樂亭用東臺韻

四首

郝良臣

西堂開客宴秋葢正娟娟玉管含聲細金尊引興偏
憑欄看過鳥隔座聽吟蟬飲罷乘驄去飄飄憶洞仙
瞻攀驚逸論酬酢羨高賢風靜千林地霜清八月天
几筵開錦繡爵羊泛雲烟更喜回輶去芳塵共接連
野館聊停駕芹泠薄致情簷花供客興庭樹贈天聲
法曲仍齊奏金波莫慢傾還嗟霜節轉隨在頌生成
旌旄勞指顧山澤喜澄清繡斧花頻近金罍酒數盈
擊搏千里志登覽一時情薄暮旋芳駕東方桂魄生
過豐樂亭謁文忠公祠愴然有懷一首

王楠

百戰河山畔孤亭春草前採樵何處問今古共凄然
邑里瞻祠臘松杉隱墓田蘋蘩一以薦落日
起藤烟
秋日豐樂亭宴集張龍坪侍御四首

王惟中

賓筵開別館秋色淨娟娟積翠當巒合新涼入座偏
輕雲斜度鳥踈柳靜鳴蟬撫景元成趣重陪栢府仙
有客臺中彥清才媿昔賢來遊豐樂地共醉夕陽天
幽谷生寒吹平林起暮烟忻茲吏牘簡勝賞得雷連
驄馬出郊坰翛然物外情羽觴浮蕙氣絲管韻松聲
簪合星應聚襟披玉爲傾何如金谷會酒罷更詩成
昔時懽賞地尚爾起今人名跡何其遠風流自有真

雲山寧改舊景物覺長新茲日登臨契無慚繼後塵

至日讌集豐樂亭

盧宗哲

正說冬寒尚未嚴今朝况復雨纖纖佳期自屬間官
賞瑞氣元從太史占雲暗諸峰時極目詩成半醉一
軒髯晚來移席前亭下真覺餘光弱線添

丁巳元日豐樂亭二首

天地同佳節衣冠幾勝游松林新歲月椒酒舊朋儔
流水青郊遍環山翠靄浮老懷何所競特爲此亭幽
雪盡諸峰出亭開一徑斜壺觴聊客意梅柳已年華
歲稔堪同慶官閑敢自誇憑欄時北望縹緲五雲賒
豐樂亭次醉翁韻三首

山禽解作四時啼相應泉聲檻外飛望裡更憐無俗
物遲遲遠岫片雲歸

鬪篇讀罷日初斜隨意山巔又水涯豐樂壺觴常好
在春風不羨上林花

春山新霽靄餘輝咲倚東風一振衣日落酣歌動林
木游人誤擬醉翁歸

丁巳重陽同盧涑西戴晉菴登豐山

黃廷用

豐山之上何崔嵬

皇祖曾提甲士來此地堪當龍虎會隔江遙指鳳凰
臺六朝形勝歸

真主百代風流屬俊才不必尊前論往事黃花綠鬢
暗相催

倚雲亭館鸞鞋鬼飛蓋交軒得得來吹帽風高憐地
主授衣日落望鄉臺江干猶冒鯨鯢苦關塞誰兼虎
豹才不覺感時翻濺淚流華容易鏡中催

冒雨攀蘿緣石磴翠微高處有仙家紫微泉遠堪成
釀黃菊山深尚未花御氣凌風天北極因敲過馬海
南涯去年京國酬佳節轉盼滁陽又歲華

旅泊江湖經六載行踪何處不爲家仙郎欲醉須更
酒神女偏慳爛熳花遙憶故人依日下誰憐游子在
天涯山前草木傷搖落尚有茱萸濕露華

次韻

盧宗哲

秋山新霽碧崔嵬吹帽風從萬里來曠望固知宜落
木高懷何啻當登臺同心更愛看花侶異代誰稱作
賦才日下西岩仍改席前林啼鳥漫相催

滁山滿目競崔嵬獨向中峰載酒來圍吏秋高堪戲
馬游人日霽好登臺江湖常着憂

君意淮海今逢濟世才籬下黃花盈把摘莫令霜鬢
自徒催

九日出來稱令節登高作賦幾名家吏情且付杯中
物客計應看葉底花切切友朋空海內嬉嬉兒女任
天涯滿前山色從吾好何俟完婚訪岱華

誰言傲吏望中賒山徑依稀靖節家邂逅不須悲白
髮登臨且共醉黃花孤鴻有意留天末群鷺何心戀
水涯身事不多官事簡總宜詩句記年華

秋日同蔣侍御讌豐樂亭時蔣病初愈

九日空過憐病客相邀今上翠微峰花前一咲身應
健郭外初來興正濃絕巘平林饒古蹟斷雲輕靄澹
秋容霜威戲假吾先醉不覺西風送暝鐘

病起文園生逸興乘驄來上最高峰霜送菊候今仍
昨秋染山光淡復濃倏爾時艱增慷慨蕭然宦况自
從容還于暇日營方藥按節應看勒鼎鐘

次韻荅蔣侍御

黃廷用

司馬著書應病暍起來徐步上高峰簾櫳近月低相
映洞壑歸雲遠更濃白日不懸車下景青年那復鏡
中容當筵喜有瓊瑤贈何處山城杳暮鐘

白昔東南多王氣龍翔鳳翥疊層峰天廻日月金風
冷地切星辰王露濃簾外清歌添逸興燈前妙舞若
爲容豺狼夜裏爭相避隱隱江村野寺鐘

秋杪升高同謝眺天南縹緲起雲峰若迷桂嶺鄉心
遠莫爲湘江客思濃皂蓋逢人如有問青山何處不
相容請看陶令開三徑敢擬王公食萬鐘

一轂過馬涵雲影指點長江江上峰莫苦病魔尋藥
去且乘酒興對花濃漢朝霜簡推公雅晉代風流說

仲容月下歸來清夢繞與君長樂聽疎鐘

豐樂亭次韻

蔣焯

楓林落日開芳讌共醉歐亭亦是家檻外疎松樓白
鶴堦前短草隱黃花衡山遙在豐山頂澗水寧通桂
水涯飲罷醒心臺上望分明北極即京華

林壑來遊日已斜望中烟樹兩三家高情盡醉豐亭
酒勝景寧輸上苑花白雪陽春詞寡和清風明月賞
無涯綺筵錯落銀河迴轉盼流光更物華

尋樂記中今共得西南深秀遠諸峰風飄紅葉時堪
舞露濕黃花晚更濃落木斷雲紆野眺丹崖翠壁自
秋容平生漫有登臨興寂寞文園幾暮鍾

萬里孤踪羈宦跡鄉心飛度祝融峰夢迷楚澤醒何處望入湘雲思正濃佳節幾年頻作客登高此日強爲容悲秋况復依衾枕愁徹滁陽五夜鍾

元日登豐樂亭

盧茂

春來何處好躋攀豐樂亭連尺五天海上陽回先禹甸山中東作又堯年舊醅不負鄰翁約新柳寧從客舍憐為報石渠書大有鄉雲白雪滿尊前時久雪甫霽

登豐樂亭

俞鸞

南譙十月菊猶黃載酒登高發興狂共向青山論往蹟手搖彩筆對斜陽鳥來幽谷音偏好人傍芳泉水自香縱飲不辭連日醉相逢盡是紫薇郎

豐山同侍御蔣毅所與翰撰陳環江言別用韻

黃廷用

瑶花琪草未爲窮春日尋芳小澗東獨步絕峰斜帶日誰言高處不禁風孤雲過鳥青霄上遠樹浮烟碧落中別後此心君自見百年交誼幾人同
花鳥春深思亦窮芳遊何日不西東雲邊乍吐千山月江上翻生萬壑風道宇全藏巖岫裏人家半在驛樓中從今此地知誰伴復得論文尊酒同

次韻

陳謹

日日尋芳興未窮
携壺更上翠微東
輿迴綠樹衝晴靄
旆旆拂青巒
起暮風天淨鳥飛圖
畫裏花明人在綺

羅中抽毫作賦瀛洲侶誰識登臨此地同
一上豐山望不窮亭前佳勝列西東夕陽低射河橋
水春樹高生石澗風人境忽移霄漢表仙家共住洞
雲中莫言南國為留滯且喜芳辰樂事同

豐樂亭

黃廷用

由來沃土偏宜稼一上豐山望可憐半郭樹林環澗
曲萬籟禾黍負城邊春風饁畝欣田峻秋日分門給
社錢憂國至今聊暫減太平簫鼓樂康年
羨此民風何太古邦人相見每從容田中滯穗堪遺
寡廩裏多餘合慶農酒熟漫尋芳草地詩成偏在白
雲峰紫薇泉畔栖霞客祇有神交一夢逢

豐樂亭

趙鈇

幽谿園古木亂石倚孤亭嵐氣侵城市泉聲出戶庭
地非當日僻山是昔年青讀罷歐公碣花前酒半醒

豐樂亭

林庭機

豐樂亭何處停驂特此來山光晴入牖月色夜當堂
閑館清爐氣高歌助酒杯主人殊愛客玉漏未須催

與客飲豐樂亭次韻

黃廷用

他鄉萍梗客同心對酒新詩醉後吟路遠曉疑秋雨
作嶺高涼怯暮雲侵行過竹院聞仙樂坐久松齋出
梵音萬里長空涵水色任從魚鳥自浮沉

登豐樂亭

王以旂

高亭千古重名賢戶牖鵬騫尚宛然簾捲半山雲出
沒塵飛十里地幽偏松杉曲徑歲僧寺鼓吹斜陽樂
舜年喜我春晴無俗擾携壺直上翠微巔

登豐樂亭次良所韻

歲久叨乘驄奔波髮白早昨從佐圉卿深負牧與草
欲上豐樂亭初春阻多潦出門看雲烟夢寐求蓬島
杖屨幸追倍苔徑緣公掃高亭儼鵬騫疊嶂如龍抱
回首望金陵形勝真天造絕巘復躋攀清風滌煩惱
賢來山以名濯濯何須道稍待天晴和共君再幽討

遊豐樂亭

康大和

海內名山擅此方登臨我與公有輝光亭開豐樂碑何
古酒出釀泉味更香地主一時逢二妙天涯明日是
重陽並遊况值瀛洲侶清賞應知宿願償

同趙太僕柱野公游豐樂亭二首

尹臺

並駕息幽岑開尊俯石林以言茲境憇聊寄昔賢心
草樹延升眺雲霞變古今亭碑重洗讀千載感同音

又

往構豐山曲荒原碧草迷

先皇開舊蹟諸老富新題野凍梅孤發山寒鳥一啼
賢哉今太僕清宴重招携

豐樂亭

羅復

地僻藏亭古花飛點竹泉壺觴開白石巾烏入蒼烟
樂事餘前守豐穰自昔年醉歸天未暝山月下平川
至滁遇曠登豐樂亭次韻 陳志
澹日輕風鳥自啼溪邊雲度亂花飛試看載道皆饑
色帶得新愁萬斛歸
檻外溪山擁碧輝釀成烟雨潤裳衣拈盃漫意當年
樂多山流忙未盡歸
紫蔓蒼藤鳥徑斜鶴鳴猿舞共生涯臺亭猶說當年
舊誰似當年共樂花

豐樂晚眺

應鑣

青嶂危巒路轉幽荒蕪深護斷碑留黔黎猶剩先朝
俗刺史寧如往哲遊萬壑烟涵斜漏日千林翠疊盡
生秋歸時爲戒前行使莫用鳴呵動鶴愁

登豐樂亭

徐陟

雨霽山亭春倍好鄒盃喜得坐東風遷喬黃鳥嚶嚶
出入望青甍處處同花醉日邊渾勝錦柳舒烟外欲
成叢逢辰每頌民偕樂報 國還期歲屢豐

豐樂亭

馬乾元

寶地控豐岑蒼蒼烟樹林泉井人自汲市近谷偏深
石作三春秀雲生兩岫陰風流人已遠同樂到于今
秋日蒙泉寅丈邀飲豐樂亭過紫薇泉

徐綱

石磴通幽徑携尊此共攀鳥啼林樹外泉溜水雲間
谷口踈花淨亭前芳草閒祗憐人境寂日暮不知還

九日同東泉寅丈登豐山絕頂

芳辰仙侶共尋幽短褐藍輿到碧丘岑寂不妨元亮
菊登高何羨孟嘉游涼雲遠度踈林霽落葉輕飄古
樹秋醉把茱萸看未盡夕陽鐘鼓上方樓

入滁登豐樂亭有懷

胡杰

十載經遊地重來續舊題蒼山仍兀々碧草漫萋々
看竹人何在尋源路不迷半生軒冕意底事問南雞

登豐山

年來耽吏隱日夕望豐山不是清秋色其如客興慳

崦嶽出鳥道藐俛空人寰坐瞰天宇寥孤雲去來還
已矣行結廬時平薄朱顏

端居鬱無緒秋風入林篠良友命佳招梯雲絕蘿鳥
振衣聊騁望一目衆山小江流淼如何野色青未了
且共恣歌嘯身世徒擾々

豐樂亭

盛汝謙

層巒疊嶂盡環滁柳色桃華半欲舒春到于今收不
住當年豐樂更何如

春日鄉達周弦齋孫環山玉成山孟兩峰石皆
春邵禎柳六先生招游豐樂亭同古泉劍西古
橋三寅長賦此

王鶴

孤亭縹緲滌山頭與客登臨散鬱愁風景獨收南國
勝地形遙控大江流千家春樹溪村合四野晴嵐遠
近浮安得抽簪隨杖履不妨終日坐林立
勝地追游樂事偏更逢春日散晴煙襟懷不落歐蘇
後風俗真如晉魏前啼鳥野花供嘯傲溪魚泉酒任
流連從來骨相宜丘壑願與青山結好緣

次韻

是日津以疾未
赴詩併及之

孟津

豐山山下碧雲頭尊酒閑消物外愁泉石有盟憐病
廢冠裳初集負名流春熙景媚梅先動野漱村醪香
自浮何幸獲瞻新杜句不教清興又林丘

甲子五月同薇田宣長登豐樂亭讌集有懷

劉秉仁

亭前雲木曉蒼涼亭上冠袍帶日光遙引市城橫似
障俯臨泉水碧於瑤好山增勝須吾輩長日成吟與
世忘詩景可人興感慨數聲啼鳥送斜陽
亭閣嵯峨野水傍登臨五月生微涼玉盃遙對竒峰
引水簾頻依翠葆張一局関河飛白日四山天籟送
青簧相看處處榴花笑惆悵雲鴻雙渺茫

豐樂亭西田再會時值大風 吳遵

山亭邀客正芳晨山下條風淨路塵幽谷不妨花信
早勝遊須放酒盃頻簷簾飄霰寒仍雪座擁爐熏煖
自春漫道尊前多樂事暮陰江郭有懸鶉

遊豐樂亭

裴宇

地因人紀勝亭以澤流傳卉樹由天植河山總帝阡
興隆原有托豐樂兆為先禮職宣
明德光昭億萬年

遊豐樂亭用少宗伯內山韻

李敏

太守樂民樂今時俗尚傳鷄犬聞隣境桑麻遍遠阡
職守慚若後風流喜我先共期常道泰樂止萬斯年

豐樂亭次內山宗伯韻

劉秉仁

翠巘雙林合芳亭千古傳靈泉分漢水瑞稼遍周阡
樹擁樓臺出雲追鼓吹先高談頻倚檻稽首頌堯年

豐樂亭次內山裴公韻

吳遵

太守何年去流風百世傳絃歌存古社禾黍長新阡
禮樂推明盛文章婉後先願留金石撰重為記豐年

初秋二日登豐樂亭

李敏

秋日重登豐樂亭憑欄東望動長吟參差樓閣千家
雨掩映桑麻四野陰擲地歐文金石奏磨崖蘇刺綠
苔侵撫今覽古多愁思況復高城急暮砧

初秋豐樂亭奉柱閣臺諸公次韻

石璽

落日千旄到野亭新秋景物動高吟文裾遠映山川
色暑氣潛消草樹陰湖海一尊千里合風塵兩鬢二

毛侵躡不盡幽探興明月孤城起暮砧

壬申端陽余與後林邀飲諸鄉先生于豐樂亭
共賞佳節喜而賦詩得若干首附于編以紀一

時之盛遊

趙軌

山亭入夏轉幽凉山色遙憐四壁蒼欲向熏風延客
會况逢勝日正端陽班荆款枕談玄味懸艾飛觴噴
草香自咲公餘常寂寞林岩何幸接仙郎
久旱田間蔓草黃偶逢甘雨沛斜陽清驅樊宇塵襟
豁翠入幽亭逸興狂暝色漸收山色燦風聲猶聽珮
聲鏘留連暮夜忘歸騎長夏何如意更長

次韻

胡文

依微亭樹午陰涼羅列峰巒晚色蒼佳節由來傳楚
俗勝遊偏喜占滁陽壺觴共有新蒲好薰沐還尋細
草香此日追歡同宇內幾人座上集仙郎

羅衣綠映葛衣黃賓主東南坐夕陽車騎雍容誰不
羨杯盤狼藉興猶狂臨流吊古招魂遠秉燭題詩落
韻鏘四事合并那易得相看莫怪話偏長

孟津

山中風景自清涼雨氣新收入望蒼碑刻流觀蘇太
史亭臺宴樂宋歐陽切蒲細細尊浮綠折筍鮮鮮味
帶香野老何當叨盛席高襟深荷紫薇郎

十載龍舟競楚黃豐亭此日又端陽煙霞滿目寧辭

醉湖海逢公也任狂習習谷風雲影靜陰陰夏木鳥
聲鏘人間何處非佳節曾似山中樂趣長

王可立

夏木陰森暑氣涼况逢佳節對青蒼偶叨元老開華
宴自愧迂疎侍夕陽角黍遙分荆地俗萸蒲細泛酒
卮香醉歸漸覺空山暮謾憶宮衣賜省郎

午日郊原鬪草黃暫隨杖履醉斜陽泛蒲共嘯渾忘
倦競渡遙憐豈是狂台座佇看真降嶽德音靜聽宛
鳴鏘歸途雨霽月初上萬壑煙雲引興長

石璽

層軒老樹夏雲涼山外風雷雨更蒼淮海芳尊憐雅

會楚江勝事說端陽玉絲影照烟霞色萬壑陰生薜
荔香莫訝主翁歌白雪明光起草舊仙郎

匹馬遙衝曉霧黃孤亭徙倚對斜陽淹留錦席隨仙
侶潦倒蒲觴學楚狂世局陰晴爭變幻詩篇金石共
鏗鏘清時佳節優悠處廊廟山林雨露長

遊豐樂亭次東洲崔公韻 劉穩

亭開豐樂相傳久此日登臨快所瞻一代風流千古
重滿山花鳥四時兼櫻桃逸屋珠成樹薇井分流玉
作簾巧思不須陶謝手眼前詩景任吾拈

次韻

王之垣

名賢往日名山興剩有山亭喜共瞻鳥道岐分雙岫

迥龍泉繞處五雲兼行看翠竹影鋪徑坐對蒼松清
入簾却憶醉翁琴上曲東坡公有醉翁亭琴操曲誰人解向此中
拈

次韻

韓必顯

秀木繁陰淨炎暑披襟一懋慰依瞻花光正與壺觴
共鳥語還將絲竹兼六一至今成往事溪山猶自透
踈簾不辭歸路催沉漏詩思猶堪帶晚拈

醒心亭

醒心亭

常安民

爲愛昌黎湖上句醉來只上醒心亭吹醒不待山風
解卧讀殘碑已自醒

戴金

寸赤源頭本自虛試登高處更惺如幽崖午照無紆
曲廣谷晴雲有卷舒跌宕曾襟看萬壘從容意緒省
三餘引身指顧龍潭近風景油然卽舞雩

壯懷亭

大觀何處徹淵魚出幻尋真道不虛足躡雲根山到
頂眼橫煙際景環滁隨方有路皆人境極遠無涯屬

我廬剛說振衣千仞上緇塵不著是天衢

紫薇泉

徐九臯

幽谷本多奇名泉復在茲白雲依靜石玄藻弄清漪
澄質塵無滓分流潤不私濯纓真勝地襟抱若爲期

胡松

積雨泉流駛經年客思攄常因清絕處忽厭市朝居
樹影臨渠密鶯聲向晚疎憑高一以眺百慮故應除
層阿依絕岫落日下空林澤氣通山澗泉光照客心
清冷宜盟濯遲暮坐侵尋興洽忘朝晏歸歟一朗吟

田濡

山樽晚酌逐晴暉移到巖前對紫薇石竇細聽憐玉

漱雲峯共倚儼屏圍拂泉楊柳連村迥分潤桃花夾
岸肥爲挹清深延夜話坐來纖月亦相依

史褒善

江天寥廓水潺湲石勢重分虎豹關松捲長風巨壑
吼地接金陵春晝閒紫薇亭畔煙如擲燭龍捧出千
厓赤流雲滿洞誰爲携野鶴翻翻下沙磧有客杖藜
自中州四海十年羨壯遊潦倒但醉滁陽酒茫茫寰
宇一浮鷗

幽谷泉

歐陽脩

踏石弄泉流尋源入幽谷泉傍野人家四面深篁竹
澗稻滿春疇鳴渠遶茆屋生長飲甘泉蔭泉栽美木

溪溪無恙冬日夜響田曲自言今白首未慣逢朱轂
顧我應可恠每來猶不足

四月九日幽谷見緋桃盛開

經年種桃滿幽谷花開不暇把一卮人生此事尚難
必况欲功名書鼎彝深紅淺紫看雖好顏色不柰東
風吹緋桃一樹獨後發意若待我留芳菲清香嫩蕊
含不吐日日恠我來何遲無情草木不解語向我有
意偏依依群芳落盡始爛熳榮枯不與衆艷隨念花
意厚何以報唯有醉倒花東西盛開比落猶數日清
尊尚可三四携

答謝判官獨遊幽谷見寄

聞道幽亭偶獨登悵然懷我未忘情新花日向遊人
笑啼鳥時爲舊日聲因拂醉題詩句在應憐手種樹
陰成須知別後無由到莫厭頻携野客行

送謝中舍

滁山幽谷抱山斜我鑿清泉子種花故事留傳父老
說世人今作畫圖誇金閨引藉子方吐白髮盈簪我
可嗟試問絃歌爲縣政何如罇俎樂無涯

謝判官幽谷種花

淺深紅白宜相間先後仍須次第栽我欲四時携酒
去莫教一日不花開

憶滁州幽谷

滁南幽谷抱千峯高下山花遠近紅當日辛勤皆手
植而今開落任春風主人不覺悲華髮野老猶能說
醉翁誰與援琴親寫取夜深泉在翠微中

和歐陽先生幽谷晚飲

曾鞏

先生卓難攀才真帝王佐皎皎衆所病蜿蜿龍方卧
卷彼天下惠赴此一郡牧幕府既多暇山水乃屢過
旌旗拂蒙密車馬經坎坷愛我谷中泉聲響遠已播
槎橫勢逾急雨點綠新破旁生竹相闐竦竦碧千箇
遙源窅難窺盤石坦如磋遊鱗戢可數飛鳥嚶相和
援琴薰風後結宇寒巖左觥筵已得月金紈尚圍坐
心如合逍遙語不綴拾些一時聳得觀千載激柔懦

甘棠詩之懷峴首淚嘗墮况此盛德下襦袴人所荷
不假碑刻垂棟牖敢隳控當今甲兵後天地合轆軻
先生席上珍豈忍溝中餓毋徐黑幡召當馳四方賀

王安石

雲翳翳兮谷之幽天將雨兮田之稠有繩于防兮有
畚于溝我公不出兮誰省吾憂日暉暉兮山之下歲
則熟兮收者舞吾收滿車兮棄者滿莒誰吾與樂兮
我公燕語山有木兮谷有泉公與客兮醉其間芳可
攀兮甘可漱無吐無穉兮環公以笑公醉而歸兮人
則嘉公好我州兮殆其肯止公歸不醉兮我之憂豈
其不懌兮將舍吾州公一朝兮去我我歲歲兮來遊

完公亭兮使勿毀以慰我民兮歲歲之愁

陳璉

天寧寺前是幽谷暖翠晴嵐紛在目云昔歐陽公所
開鑿泉築亭種花木閒携賓從醉其間鳥弄泉鳴當
絲竹當時賦詠總名流萬丈文光起林麓一從公後
幾百年芳草萋萋春自綠陰崖白晝走鼯鼠古澗寒
流飲麋鹿余因暇日喜遊覽五馬駢駢度溪曲廢址
閒披荆棘尋斷碑自剥莓苔讀何須懷古重悽惻對
酒高歌送黃鵠方今

聖人隆盛治海宇黎民喜豐足嗟余德薄才復踈祇
荷

天恩忝爲牧何當築亭兼鑿泉題詩遠嗣前賢躅

趙廷瑞

谷口天寧寺人傳花滿谿山公時取醉姚合日畱題
熊軾能兼隱龍圖意不迷歲豐真有象緬想斷橋西

余胤緒

滁山皆崔嵬中復有幽谷造化含真機群動以靜育
脈絡紫薇泉亦自元氣淑嘉禾潤澤悠匪直茂花木
醉余經品題千載遂刮目濯纓聽爾歌觀物慎所獨
愧予澄濁功濫荷王明福願習闇然訓爲霖沾蔀屋

菱溪大石

歐陽脩

清霜夜落秋水淺有石露出寒溪垠苔昏土蝕禽鳥

啄出沒溪水秋復春溪邊老翁生長見疑我來視何
殷勤愛之遠徙向幽谷曳以三犢載兩輪行穿城中
罷市看但驚可恠誰復珍荒煙野草埋沒久洗以石
竇泠清泉朱闌綠竹相掩映選致佳處當南軒南軒
傍列千萬峯曾未有此奇嶙峋乃知異物世所少萬
金曾買傳幾人山河百戰變陵谷何爲落彼荒溪濱
圖經地誌不可究坐令異說爭紛紜或云女媧初鍛
鍊融結一氣凝緼縕仰視蒼蒼補其缺染以青碧瑩
且溫或疑古者燧人氏鑽以出火爲炮燔苟非神聖
親手迹不爾孔竅誰雕刻又云漢使把漢節西北萬
里窮崑崙行經于閩得寶玉流入中國隨河源沙磨

水激自穿穴所以鑄鑿無瑕痕嗟余有口莫能辯嘆
息但以兩手捫虛仝韓愈不在世彈壓百恠無雄文
爭奇鬪異各取勝遂致荒誕無根原天高地厚靡不
有醜好萬狀奚足論惟當掃雪席其側口與佳客陳
清鑄

菱溪夜雨

祝孟獻

菱溪溟溟向昏黑雨脚如麻轉稠密孤村漁火滅復
明滴瀝船窗聲愈急野竹瀟瀟秋夜長此景遙憶同
瀟湘幾回欹枕不成寐坐燒銀燭歌滄浪

任啓

扁舟曾宿採菱溪夜雨瀟瀟水拍堤林影遙連雲影

黑風聲輕急浪聲齊吟懷西塞情偏好思入巴山意
轉迷獨起推篷閒聽久絕聲剪燭小窻西

醒心亭

張舜臣

年豐偏喜事登臨雲樹江村日醒心須識醉翁非嗜
酒祗緣同樂與民深

紫薇泉

喜看幽谷噴鳴泉一派清流湛碧天澤溥春疇生事
足故令遊客日翩翩

吐懷亭

谷口亭臨萬壑前遊人到此詫飛仙有懷欲獻雙龍
闕落日遙看北斗懸

幽谷

天生幽谷本來奇翠削巖峯對不移流水飛花偏自
得遷喬且莫誦周詩

重陽恣登覽幽勝滿標題樹影環深谷泉流遶暗溪
遙看江浦秀俯訝海雲低山色新過雨清風送馬蹄

景歐亭

六一風流百世珍文章勲業倍堪親幸余山斗瞻依
近豐樂相看密切隣

菱溪石

菱溪恠石絕塵氛疑自崑崙萬里分却恨璘珣今落
寞祗餘幽谷悵斜曛

秋日登醒心亭二首

章煥

搖落秋容淨，天空氣汰寥。偶來亭上坐，萬慮此俱消。
吾道滄洲在，清風寄一瓢。寒泉如可注，聊爲洗紛囂。
世路今如此，何人是獨醒。秋風到幽谷，颯爽見斯亭。
水落知涯涘，蟬吟識性靈。悠然會心處，獨對數峯青。

再至醒心亭二首

頻年驅俗駕，今上醒心亭。妙悟元無著，名區自有靈。
眠雲接澹泊，漱石激清泠。爲謝來轅客，山中岫幌倚。
忽聽枝頭鳥，花間喚客醒。迷途皆浪迹，好景在閒庭。
日送浮雲過，心依逝水停。人間有塵夢，飛不到幽亭。

題壯懷亭

凌晨出西郊，山川一何壯。感茲壯士懷，因之寄昭曠。
神遊浩無垠，性靈復疏鬯。誰云大化徂，形骸聊縱浪。
俯仰宇宙間，獨立風塵上。

暮春同鄭平山包吉山過幽谷閒眺

錢文爵

梨花三月候零落，又江城共會靜中意。來尋石上盟，
開尊浮竹葉到耳。是泉聲良晤，應須續園葵。正好烹

次韻

鄭用賓

展席依芳草，凭欄俯近城。共憐黃鳥暮，暫與白雲盟。
島樹分晴靄，山泉落澗聲。羨君多逸興，香茗更同烹。

又賦

江草萋萋江水平啼花嬌鳥是春聲停雲坐想天涯
去對酒聊歌澤畔行落照橫籬連錦照新苔松逕度
鸞笙徘徊不盡登臨意惆悵春歸白髮生

次韻

包大魁

茲地傳幽谷桃花似錦城浪遊羸勝賞到處喜新盟
黃鵠雲霄影蒼松石澗聲澹然塵慮息汲井自爲烹

紫薇亭獨遊

王惟中

獨倚閑亭白日斜紫薇深處宛仙家山童引鶴啼毛
羽道士疏泉養藥花纓紱相牽身未去雲泉有分思
偏遐空天湛澹秋將老俯仰流光感歲華

醒心亭紀游四首

並序

盧茂

醒心有亭創自宋歐陽子後四百八十年而興復
者爲明守陳則清氏嗣是不葺者又三十餘年
歲丁巳貳卿王公撤而新之量徙故址數武而景
益竒壯坐斯亭也心目灑然真得昔人命名之趣
亭落成屬公解組去無記其事者因作四時詩以
見意云

右春

山色明如繡晴窗俯碧流桃花三萬樹疑是武陵頭
避暑探幽勝高亭一醒心萬緣從此息不作楚江吟

右夏

結構層峰上堪同王檠樓縱觀天北極黃葉不勝秋

右秋

乾坤飄瑞雪，晶晶映危欄。虛白元吾好，寧知身外寒。

右冬

幽谷六言四首

欲上高亭攬秀先，從幽谷探竒草。沒劉家故物苔封

晉代殘碑

靄靄烟迷芳徑，潺潺水透清溪。花傍虛巖新發，鶯遷

喬木嬌啼

雨霽峰頭生色，月明澗底流輝。清吹數聲何處，長空

孤鶴飛歸

橋下漫尋苔石，洞中初試茶芝。但願飽樽有酒，莫言

塵世多岐

壯懷亭三五七言

醽醁酒艷陽天，跡弛班都尉。風流李謫仙，萬里封疆

定尊俎，一川花柳付詩篇。

紫薇泉

紫薇元屬省堂前，學士移來植水邊。微老泉湮學士
去，游人猶道紫薇泉。

菱溪石

菱溪當日傳竒石，年深世變無踪跡。物生顯晦自有
時，却咲贊皇何癩癖。

登醒心亭

黃廷用

夕陽人渡小橋東
隱隱雲屏入畫中
醉裏同遊誰獨醒
半輪明月挂前峰

紫微泉

王以旂

白沙泉湧淨無泥
清徹冰壺醴味齊
不是紫微郎愛飲
泉香應着紫微題

倚豐吟

胡杰

英々豐山雲眇々
豐人望山雲本無心
陰晴詭殊狀
吁嗟望豐人
豐殖胡以時
四躰不勤動
宣父行見嗤
柰何倚豐者
悠悠任天假
陽雨一愆次
號吟遍中野
天門閬九重
雲中君不聞
目極但心怒
山雲日氤氳
醒心亭與友人論學

一竅誰開混沌天
半生醒夢落塵詮
悠悠絕學空遺響
炯々良知豈獨傳
編常不聞心外訣
團蒲何事定中禪
于今會得惺々法
絃尚稀聲酒尚玄

紫微泉

盛汝謙

與客提壺到紫微
泉心滾々噴珠飛
問渠怎得甘如許
分兩原來似者稀

胡杰

紫薇花發水流香
泉石今猶侈醉鄉
幾度看花頻酌水
頽然如對紫微郎

冬日醒心亭次韻

石璽

朔風吹曠野
載酒山中行
斜陽下西嶺
蕭蕭黃葉聲

良朋集幽谷盤桓話無生撫景慨聞寂洗我緣慮縈
虛空海一漚放浪萬事輕浮雲淨碧落霜月湛孤清
緬懷物外人悠悠得此情



